

四庫全書

史部

欽定四庫全書

史部

遼史卷

八十八至
九十八

詳校官庶吉士

臣何道冲

給事中_臣查善長覆勘

總校官編修

臣朱 銓

校對官助教

臣周 鉉

謄錄監生

臣沈樹東

欽定四庫全書

遼東卷八十八

元中書右丞相總裁托克托等修

列傳第十八

蕭迪里色拉

耶律博諾

蕭巴雅爾

恒德必塔

耶律資忠

耶律揚珠

耶律鴻觀

高正

耶律達魯

大康又

蕭迪里字尼嚕古宰相塔喇四世孫識度弘遠為鄉里
推重始為牛羣散史帝聞其賢召入侍遷國舅詳袞統
和二十八年帝謂群臣曰高麗康肇弑其君誦立誦族
兄詢而相之大逆也宜發兵問其罪羣臣皆曰可迪里
諫曰國家連年征討士卒抗敵況陛下在諒陰年穀不
登創痍未復島夷小國城壘完固勝不為武萬一失利
恐貽後悔不如遣一介之使往問其故彼若伏罪則已

不然俟服除歲豐舉兵未晚時令已下言雖不行識者
避之明年同知左伊勒希巴事尋改右開泰初率兵巡
西邊額爾奇木部下扎薩克轄布喇奇寶卜克率部民
遁迪里追擒之令復業遷國舅詳袞從樞密使耶律世
良伐高麗還如同政事門下平章事拜上京留守迪里
為人寬厚達政體廷臣皆謂有王佐才漢人行宮都部
署王繼忠薦其材可為樞密使帝疑其黨而止為中京
留守卒族子和克有傳弟巴拉

把拉字希哩音多智善騎射開泰間以兄為右伊勒希
巴補郎君累遷奚六部圖哩太尉太平末大延琳叛巴
拉將北南院兵往討遇于蒲水南院兵少却至手山復
與賊遇把拉乃易兩院旗幟鼓勇力戰破之上聞以手
詔褒獎賜內殿馬重熙中遷四捷軍詳袞謝事歸鄉里
數歲起為昭德軍節度使尋改國舅詳袞卒

耶律博誥字和彌心特哩袞尼嚕古之孫景宗時為烏
爾古部詳袞嚴急民苦之有司以聞詔曰博誥任方面

寄以細故究問恐損威望尋遣馬羣太保統和十六年
隱實燕軍之不任事者汰之二十八年駕征高麗博諾
為先鋒至銅州高麗將康肇分兵為三以抗我軍一營
于州西據三水之會肇居其中一營近州之山一附城
而營博諾率耶律鴻觀擊破三水營擒肇李玄蘊等軍
望風潰會大軍至斬三萬餘級追至開京破敵於西嶺
高麗王詢聞邊城不守遁去博諾入開京焚其王宮迺
撫慰其民人上嘉其功遷北院大王薨

蕭巴雅爾字韓隱國舅少父房後多智略能騎射統和
初為左皮室詳袞討準布有功四年破宋將曹彬米信
兵於望都凡軍事有疑每預叅決尋總永興宮分紂及錫
里伊喇二皮室等軍與樞密使耶律色珍收復山西所
陷城邑是冬攻宋隸先鋒圍蒲城率所部先登拔之改
南京統軍使尚衛國公主拜駙馬都尉加同政事門下
平章事十三年歷北南院宣徽使條上時政得失及賦
役法上嘉納焉十五年加政事令遷東京留守二十二

年復攻宋將渤海軍下德清軍後蕭達林卒專任南面
事宋和議成為北府宰相聖宗征高麗將兵由北道進
至開京西嶺破敵軍斬數千級高麗王詢懼奔平州已
雅爾入開京大掠還帝嘉之封蘭陵郡王開泰二年以
宰相知西南面招討使五年進王東平已雅爾為政寬
裕善斷諸部畏愛民以殷富時議多之七年再伐高麗
至開京敵奔潰縱兵俘掠而還渡茶陀二河敵夾射已
雅爾委甲仗走坐免官太平三年復王幽薨弟恒德

恒德字遜寧有膽畧而善謀統和元年尚越國公主拜駙馬都尉遷南面林牙從宣徽使耶律阿穆爾征高麗還改北面林牙會宋將曹彬米信侵燕耶律休格與恒德議軍事多見信用為東京留守六年上攻宋圍沙堆恒德獨當一面城上矢石如雨恒德意氣自若督將士奪其陴城陷中流矢太后親臨視賜藥攻長城口復先登太后益多其功時高麗未附恒德受詔率兵拔其邊城王始懼上表請降十二年八月賜啟聖竭力功臣從都

部署和碩鼐討烏舍未戰烏舍請降恒德利其俘獲不許烏舍死戰城不能拔和碩鼐議欲引退恒德曰以彼倔强吾奉詔來討無功而還諸部謂我何若深入多獲猶勝徒返和碩鼐不得已進擊東南諸部至高麗北鄙比還道遠糧絕士馬死傷甚衆坐是削功臣號十四年為行軍都部署伐博囉滿達勒還公主疾太后遣宮人賢釋侍之恒德私焉公主恚而薨太后怒賜死後追封蘭陵郡王子必塔

必塔字蘇隱一名昌裔生未月父母俱死育于禁掖既長尚秦晉王公主拜駙馬都尉為殿前副點檢統和八年改北面林牙太平四年遷殿前都點檢出為國舅詳察九年渤海大延琳叛劫掠隣部與南京留守蕭孝穆往討孝穆欲全城降乃築重城圍之數月城中人陰來納款遂擒延琳東京平以功封蘭陵郡王十一年聖宗不豫先是欽哀與仁德皇后有隙以必塔嘗為后所愛忌之時護衛馮嘉努上變誣弟楚布與必塔謀逆以皇

后攝政徐議當立者公主竊聞其謀謂必塔曰爾將無
罪被戮與其死何若奔女直國以全其生必塔曰朝廷
詎肯以飛語害忠良寧死弗適他國及欽哀攝政殺之
耶律資忠字烏延小字札拉系出仲父房兄果囉善屬
文聖宗重之時妻弟之妻阿古與奴通將奔女直國果
囉追及奴殺之阿古自經阿古母有寵于太后事聞大
后怒將殺之帝度不能救遣人訣別問以後事果囉謝
曰陛下憫臣無辜恩漏九泉死且不朽既死人多寃之

在獄著免賦寤寐歌為世所稱資忠博學工辭章年四十未仕聖宗知其賢召補宿衛數問以古今治亂資忠對無隱開泰中受中丞眷遇日隆初高麗內屬取女直六部地以賜至是貢獻不時至詔資忠往問故高麗無歸地意由是權貴數短於上出為上京副留守四年再使高麗留弗遣資忠每懷君親輒有著述號西亭集帝與羣臣宴時一記憶曰資忠亦有此樂乎九年高麗上表謝罪始送資忠還帝郊迎同載以歸命大臣宴勞留

禁中數日謂曰朕將屈卿為樞密何如資忠對曰臣不敢奉詔乃以為林牙知特哩衮事初資忠在高麗弟昭為著帳郎君坐罪沒家產至是乃復橫帳且還舊產詔以外戚女妻之是時樞密使蕭和卓少師蕭巴格有寵資忠不肯俛附詆之帝怒奪官數歲出知來遠城事歷保定昭德二軍節度使聖宗崩表請會葬既至伏梓宮大慟曰臣幸遇聖明橫被構譖不獲盡犬馬報氣絕而蘇興宗命醫治疾久之言國舅侍中無憂國心陛下

下不當復用唐景福舊號于是用事者惡之遣歸鎮卒
弟昭有傳

耶律楊珠字布爾錦積慶宮人父海古勒室韋部節度
使楊珠篤學廉介有經世志統和十年累遷積慶宮使
聖宗嘗諭楊珠曰聞卿正直是以進用國有利害爾言
宜無所隱由是所陳多見嘉納上征高麗破康肇軍于
銅州揚珠之力為多王詢乞降羣臣議皆謂宜納揚珠
曰王詢始一戰而敗遽求納款此詐耳納之恐墮其姦

計待其勢窮力屈納之未晚已而詢果遁清野無所獲其衆阻險而壘攻之不下揚珠以計降之擢拜四番部詳袞時招討使耶律博迪為總管揚珠恥居其下上表曰臣先朝舊臣今既垂老乞還新命覬得常侍左右帝曰朕不使汝久處是任且命無隸招討得專奏事到部戢暴懷善政績顯著卒于官

耶律鴻觀字巴爾諾延約尼森濟汗之後統和初嘗以軍事任為伊喇詳袞尋徙南京統軍使十三年徇地南

鄱克敵於四岳橋斬首百餘級攻宋以戰功遷東京留守封楚國公後伐高麗副先鋒耶律博諾擒康肇于銅州三十年西北部叛從南府宰相耶律諾衮討之及興禁軍號令整肅諸部多降尋遷侍中卒

高正不知何郡人統和初舉進士第累遷樞密直學士上將伐高麗遣正先往諭意及還遷右僕射時高麗王詢表請入覲上許之遣正率騎兵千人迓之館于路為高麗將卓思正所圍正以勢不可敵與麾下壯士突圍

出士卒死傷者衆上悔輕發釋其罪明年遷工部侍郎
為北院樞密副使開泰五年卒

耶律達魯字伊聶仲父房之後習兵事為左皮室詳衮
統和二十八年伐高麗達魯率本部軍與博諾等擒康
肇李玄蘊于銅州帝壯之曰以卿英才為國戮力真吾
家千里駒也乃賜御馬及細鎧明年為北院大王出為
烏爾古德呼勒部都詳衮年七十二卒

大康又渤海人開泰間累官南府宰相出知黃龍府善

綏撫東部懷服額爾德尼部長布延與伊勒必來附送
于朝言博囉滿達勒界多渤海人乞取之詔從其請康
又領兵至大石河圖卜準城掠數百戶以歸未幾卒

論曰高句驪弑其君誦而立詢遼興問罪之師宜其簞
食壺漿以迎除舍以待而迺乘險旅拒俾智者竭其謀
勇者窮其力雖得其要領而顛顛獨居一海之中自若
也豈服人者以德而不以力歟况乎殘毀其宮室係累
其民人所謂以燕伐燕也歟嗚呼朱崖之棄捐之之力

也迪里之課有焉

遼史卷八十八

欽定四庫全書

遼史卷八十九

元中書右丞相總裁托克托等修

列傳第十九

耶律庶成

庶箴

富魯

楊哲

耶律韓留

楊佖

耶律華善

耶律庶成字喜隱小字辰賚季父房之後父烏津檢校

太師庶成幼好學書過目不忘善遼漢文字於詩尤工
重熙初補牌印郎君累遷樞密直學士與蕭罕嘉努各
進四時逸樂賦帝嗟賞初契丹醫人鮮知切脉審藥上
命庶成譯方脉書行之自是人皆通習雖諸部族亦知
醫事時入禁中叅決疑議偕林牙蕭罕嘉努等撰實錄
及禮書與樞密副使耶律德修定法令上詔庶成曰方
今法令輕重不倫法令者為政所先人命所繫不可不
慎卿其審度輕重從宜修定庶成參酌古今刊正訛謬

成書以進帝覽而善之庶成方嚮用時為妻呼敦所誣以罪奪官絀為庶耶律使吐蕃凡十二年清寧間始歸帝知其誣詔復本族仍遷所奪官卒庶成嘗謂林牙夢善卜者呼魯古卜曰官止林牙因妻得罪及置於理法當離婚呼敦適有娠至期不產而死剖視之其子以手抱心識者謂誣夫之報有詩文行于世弟庶箴

庶箴字辰富善屬文重熙中為本族將軍咸雍元年同知東京留守事俄徙烏延突厥部節度使九年知薊州

事明年遷都林牙上表乞廣本國姓氏曰我朝創業以來法制修明惟姓氏止分為二耶律與蕭而已始太祖制契丹大字取諸部鄉里之名續作一篇著于卷末臣請推廣之使諸部各立姓氏庶男女婚媾有合典禮帝以舊制不可遽釐不聽太康二年出耶律伊遜為中京留守庶箴與耶律孟簡表賀頃之伊遜復為樞密使專權恣虐庶箴私見伊遜泣曰前抗表非庶箴之願也伊遜信其言乃得自安聞者鄙之八年致仕卒子富魯

富魯字努展幼聰悟好學甫七歲能誦契丹大字習漢文未十年博通經籍重熙中舉進士第主文以國制無契丹試進士之條聞于上以庶箴擅令子就科目鞭之二百尋命富魯為牌印郎君應詔賦詩立成以進帝嘉賞顧左右曰文才如此必不能武事富魯奏曰臣自蒙義方兼習騎射在流輩中亦可周旋帝未之信會從獵三矢中三兔帝奇之轉通進是時父庶箴嘗寄戒諭詩富魯答以賦衆稱其典雅寵遇漸隆清寧初卒

楊哲字昌時安次人幼通五經大義聖宗聞其穎悟詔試詩授秘書省校書郎太平十一年擢進士乙科為著作佐郎重熙十二年累遷樞密都承旨權度支使登對稱旨進樞密副使歷長寧軍節度使山西路轉運使知興中府清寧初入知南院樞密使與姚景行同總朝政請行柴冊禮封趙國公以足疾復知興中府咸雍初徙封齊召賜同德功臣尚書左僕射兼中書令拜樞密使改封晉給宰相樞密使兩廳僚從封趙王屢請歸政益

賜保節功臣致仕太康五年例改遼西郡王薨

耶律韓留字索紐仲父隋國王之後有明識篤行義舉
止嚴重工為詩統和間召攝御院通進開泰三年稍遷
烏爾古德呼勒部都監知詳袞事德呼勒叛將宮分軍
從樞密使耶律世良平之加千牛衛大將軍重熙元年
累遷至同知上京留守改奚六部圖哩太尉性不苟合
為樞密使蕭嘉哩所忌上欲召用韓留嘉哩言目病不
能視議遂寢四年召為北面林牙帝曰朕早欲用卿聞

有疾故待之至今韓留對曰臣昔有目疾才數月耳然亦不至于昏第臣驚拙不能事權貴是以不獲早覲天顏非陛下聖察則愚臣豈有今日耶詔進述懷詩上嘉歎方將大用卒

楊佖字正叔南京人幼穎悟異常讀書自能成句識者奇之弱冠聲名籍甚統和二十四年舉進士第一歷校書郎大理正開泰六年轉儀曹郎典掌書命加諫議大夫出知易州治尚清簡徵發期會必信入為大理少卿

累遷翰林學士文章號得體八年燕地饑疫民多流殍
以佶同知南京留守事發倉廩振乏絕貧民鬻子者計
傭而出之宋遣梅詢賀千齡節詔佶迎送多唱酬詢每
見稱賞復為翰林學士重熙元年陞翰林學士承旨丁
母憂起復工部尚書歷忠順軍節度使朔武等州觀察
處置使天德軍節度使加特進檢校太師同中書門下
平章事復拜參知政事兼知南院樞密使十五年出為
武定軍節度使境內亢旱苗稼將槁視事之夕雨澤霑

足百姓歌曰何以蘇我上天降雨誰其撫我楊公為主
漂陽水失故道歲為民害乃以已俸創長橋人不病涉
及被召群民攀轅泣送上御清涼殿宴勞之即日除吏
部尚書兼門下侍郎同中書門下平章事上曰卿今日
何減呂望之遇文王佶對曰呂望比臣遭際有十年之
晚上悅其居相位以進賢為已任事總大綱責成百司
人人樂為之用三請致政許之月給錢粟僚隸四時遣
使存問卒有登瀛集行于世

律耶華善字特默系出季父房善滑稽重熙初補祗候
郎君時帝篤于親親凡三父之後皆序父兄行第於華
善尤狎愛然每侍宴飲雖詼諧未嘗有一言之過由是
上益重之歷積慶永興宮使累遷至同知南院宣徽使
事南面林牙十六年出為懷化軍節度使俄召為御史
大夫二十三年因大冊加天平軍節度使檢校太師徙
中京路案問使卒華善雅有美行數以財恤親友人皆
愛重然嗜酒不事事以故不獲柄用或以為言答曰吾

非不知顧人生如風燈石火不飲將何為晚年沈湎尤甚人稱為酒仙云

論曰庶成定法令治民者不容高下其手庶箴雖嘗表請廣姓氏以秩典禮其隨勢俯仰則有愧於其子富魯矣楊皙為上寵遇迭封王爵而功業不少槩見然得愛民治國之要其楊佶哉

遼史卷八十九

遼史卷八十九考證

耶律庶成傳補牌印郎君 按百官志耶律庶成嘗為翰林都林牙在重熙十三年與興宗本紀合傳未載

遼史卷八十九考證

欽定四庫全書

遼史卷九十

元中書右丞相總裁托克托等修

列傳第二十

蕭阿拉

耶律義先

耶律信先

蕭托輝

蕭塔喇噶

耶律達魯

蕭阿拉字額哩埒北院樞密使孝穆之子也幼養宮中

興宗尤愛之重熙六年為弘義宮使累遷同知北院樞密使加同中書門下平章事出為東宮留守二十一年拜西北路招討使封西北郡王尋尚秦晉國王公主拜駙馬都尉清寧元年遺詔拜北府宰相兼南院樞密使進王韓明年改北院樞密使徙王陳與蕭格同掌國政格諂諛不法阿拉爭之不得告歸上由此惡之除東京留守會行色克色哩禮入朝陳時政得失格以事中傷帝怒縊殺之皇太后營救不及大慟曰阿拉何罪遽見

殺帝優加賻贈葬乾陵之赤山阿拉忠果曉世務有經濟才議者以謂阿拉若在無重元伊遜之亂

耶律義先裕悅仁先之弟也美風姿舉止嚴重重熙初補祇候郎君班詳袞十三年車駕西征為十二行紂都監戰功最改南院宣徽使時蕭格同知樞密院事席寵擅權義先疾之因侍讌言于帝曰格狡佞喜亂一朝大用必誤國家言甚激切不納它日侍宴上命羣臣博負者罰一巨觥義先當與格對憮然曰臣縱不能進賢退

不肖安能與國賊博哉帝止之曰卿醉矣義先厲聲詬
不已上大怒賴皇后救得解翌日上謂格曰義先無禮
當黜之格對曰義先天性忠直今以酒失而出誰敢言
人之過上謂格忠直益加信任義先鬱鬱不自得然議
事未嘗少沮又於上前博義先祝曰向言人過冒犯天
威今日一擲可表愚款俄得堂印上愕然十六年為殿
前都點檢討富珠哩多所招降獲其酋長托多羅以歸
手詔褒獎以功改南京統軍使封武昌郡王奏請統軍

司錢營息以贍貧民未暮軍器完整民得休息二十一年拜特哩袞進王富春薨年四十二義先嘗戒族人曰國中三父房皆帝之昆弟不孝不義尤不可為其接下無貴賤賢否皆與均禮其妻晉國長公主之女每遇中表親非禮服不見故内外多化之清寧間追贈許王弟信先

信先興宗以其父貴音為刺血友幼養于宮善騎射重熙十四年為左護衛太保同知殿前點檢司事十八年

兼右祇候郎君班詳袞上問所欲信先曰先臣貴音與
陛下分如同氣然不及王封儻使蒙恩地下臣願畢矣
上曰此朕遺忘之過追封燕王是年從蕭惠伐夏敗於
河南例被責清寧初為南面林牙卒

蕭托輝字烏庫哩宰相轄達六世孫剛直有威重咸雍
初任馬羣太保素知羣牧名存實亡悉閱舊籍除其羸
病錄其實數牧人畏服托輝上書曰羣牧以少為多以
無為有上下相蒙積弊成風不若括見真數著為定籍

公私兩濟從之畜產歲以蕃息太康中累遷契丹行宮都部署上嘗謂羣臣曰北樞密院軍國重任久闕其人耶律阿蘇蕭額特埒二人孰愈羣臣各譽所長托輝獨默然上問卿何不言托輝曰額特埒懦而敗事阿蘇有才而貪將為禍基不得已而用敗事猶勝基禍上曰托輝雖魏徵不能過但恨吾不及太宗爾然竟以阿蘇為樞密使由是阿蘇銜之九年西園不寧阿蘇奏曰邊隅事大可擇重臣鎮撫上曰托輝何如阿蘇曰誠如聖旨

遂拜西南面招討使阿蘇陰與蕭阿古岱誣奏賊掠漠南牧馬及居民畜產托輝不急追捕罪當死詔免官久之起為塔布城節度使未行疽發背卒托輝負氣怒則須髯輒張每有大議必毅然決之雖上有難色未嘗遽已見權貴無少屈竟為阿蘇所陷時人惜之二子曰圖們錫實阿蘇死始獲進用

蕭塔喇噶字托實六院部人素剛直太祖時坐叔祖特依順謀殺裕悅實噶沒入弘義宮世宗即位以舅氏故

出籍補國舅別部敝史或言泰寧王察克有無君心塔喇噶曰彼縱忍行不義人孰肯從他日侍宴酒酣塔喇噶捉察克耳強飲之曰上固知汝傲狠然以國屬曲加矜憫使汝在左右且度汝才何能為若長惡不悛徒取赤族之禍察克不能答強笑曰何戲之虐也天祿末塔喇噶為北府宰相及察克作亂塔喇噶醉詈曰吾悔不殺此逆賊尋為察克所害

耶律達魯字陽隱孟父楚國王之後性質直多膂力察

克作亂達魯聞之入見壽安王慷慨言曰願得精兵數
百破賊黨王嘉其忠穆宗即位為北院宣徽使上以飛
狐道狹詔達魯廣之明年將兵援河東至太原與漢王
會于高平擊周軍敗之仍降其衆忻代二州叛將兵討
之會耶律塔喇至敗周師於忻口師還卒

論曰忠臣惟知有國而不知有身故惡惡不避其患阿
拉以諂諛不法折蕭格托輝以用必基禍言阿蘇塔喇
噶以忍行不義徒自取赤族之罪責察克其心可謂忠

矣言一出而禍輒隨之吁邪正既不辨國焉得無亂哉

遼史卷九十

欽定四庫全書

遼史卷九十一

元中書右丞相總裁托克托等修

列傳第二十一

耶律罕巴

耶律唐古

蕭珠展

藥師努

耶律玦

耶律布勒圖

耶律罕巴字嘲隱北院詳袞古之五世孫個儻有大志
太平中游京師寓行宮側惟囊衣匹馬而已帝微服出

獵見而問之曰汝為何人罕巴初不識漫應曰我北院部人罕巴來覓官耳帝與語知有長才陰識之會北院奏南京疑獄久不決帝召罕巴馳驛審錄舉朝皆驚罕巴量情處理人無冤者上嘉之籍羣牧馬闕其二同事者考尋不已罕巴略不加詰即先馳奏帝益信任景福元年為左伊勒希巴徙北面林牙眷遇優異重熙中改北院大王務寬仁復為左伊勒希巴十二年再為北院大王入朝帝從容謂曰卿守邊任重當實府庫振貧乏

以報朕既受詔愈竭忠謹知無不言便益為多卒年五十五上聞悼惜死之日篋無舊蓄梳無新衣遣使弔祭給葬具罕巴平居不屑細務喜愠不形嘗失所乘馬家僮以同色者代之數月不覺

耶律唐古字敵隱裕悅烏哲之庶子廉謹善屬文統和二十四年述烏哲安民治盜之法以進補小將軍遷西南面巡檢歷壕州刺史唐古特部詳袞嚴科條禁姦民驚馬於宋夏界因陳弭私販安邊境之要太后嘉之詔

邊境遵行著為令朝議欲廣西南封域黑山之西綿亘數千里唐古言戍壘太遠卒有警急赴援不及非良策也從之西番來侵詔議守禦計命唐古勸督耕稼以給西軍田于臚胸河側是歲大熟明年移屯鎮州凡十四稔積粟數十萬斛斗米數錢重熙間改烏延党項部節度使先是築哈屯城以鎮西域諸郡縱民畜牧反招寇掠重熙四年上疏曰自建哈屯城已來西番數為邊患每煩遠戍歲月既久國力耗竭不若復守故疆省罷戍

役不報是年致仕乞勒其父烏哲功于石帝命耶律庶
成製文勒石上京崇孝寺卒年七十八

蕭珠展字實倫孝穆弟果濟之子也以戚屬加監門衛
上將軍重熙十三年將衛兵討李元昊有功遷興聖宮
使富珠哩部長托多羅叛珠展為統軍都監從都統耶
律義先擊之擒托多羅珠展與義先不協誣義先罪免
官稍遷西南面招討都監坐事下獄以太后言杖而釋
之清寧初為國舅詳袞西北路招討使私取官粟三百

斛及代留畜產令主者鬻以償後族弟呼都克到部發其事帝怒決以大杖免官尋起為昭德軍節度使徵為北院宣徽使九年上以珠展先為招討威行諸部復為西北路招討使訓士卒增器械省追呼嚴號令人不敢犯邊境晏然十年入朝封柳城郡王咸雍二年拜北府宰相為北院樞密使耶律伊遜所忌誣珠展與護衛蕭和克等謀害伊遜詔獄無狀罷相出鎮順義軍卒追王晉宋梁三國姪藥師努

藥師努幼穎悟謹禮法補祇候郎君太康中為興聖宮使遷同知殿前點檢司事上嘉其宿衛嚴肅遷右伊勒希巴夏王李乾順為宋所攻求解帝命藥師努持節使宋請罷兵通好宋從之拜南面林牙改漢人行宮副部署乾統初出為安宋軍節度使卒

耶律玦字烏展約尼森濟汗之後也重熙初召修國史補符寶郎累遷知北院副部署事入見太后后顧左右曰先皇謂玦必為偉人果然除樞密副使出為西南面

招討都監歷同簽南京留守事南面林牙皇弟秦國王
為遼興軍節度使以玦同知使事多所匡正十年復為
樞密副使咸雍初兼北院副部署及秦國王為西京留
守請玦為佐從之歲中獄空者三名為孟父房詳袞玦
不喜貨殖帝知其貧賜宮戶十嘗謂宰相曰契丹忠正
無如玦者漢人則劉仲而已然熟察之玦優於仲先是
西北諸部久不能平上遣玦問狀弛慢者痛繩之以
酒疾卒

耶律布勒圖字燕隱六院林牙圖魯卜四世孫也開泰間為本班郎君有捕盜功樞密使蕭朴薦之遷率府率太平中同知南院宣徽事累遷彰聖軍節度使十六年知興中府以獄空聞十八年代夏攝西南面招討使十九年夏人侵金肅軍敗之斬首萬餘級加右武衛上將軍時近邊羣牧數被寇掠遷到塌嶺都監以治之桴鼓不鳴二十年知金肅軍事宰相趙惟節總領邊城橋道芻粟請貳帝命布勒圖副之以稱職聞清寧初歷長寧

匡義二軍節度使致仕咸雍間卒子阿古齊終倒塌嶺都監

論曰罕巴因帝微行才始見售及任以事落落知大體不負上之知矣唐古珠展經略西北邊勸農積粟訓練士卒敵人不敢犯玦以忠直見稱於上布勒圖以幹敏為宰相佐在鎮俱以獄空聞之數人者豈特甲冑之士亦李牧程不識之亞歟

遼史卷九十一

遼史卷九十一考證

耶律唐古傳歷壕州刺史

按壕州刻本舊作豪州考

地理志壕州在顯州東北二十里 又按營衛志亦有壕州之名謹據改

重熙四年上疏不報是年致仕

按弘簡錄重熙十四

年唐大為右伊勒希巴興宗本紀則係十七年事是唐古致仕當在十七年之後且嘗為伊勒希巴也傳有脫訛

遼史卷九十一考證

欽定四庫全書

遼史卷九十二

元中書右丞相總裁托克托等修

列傳第二十二

蕭道拉

蕭布達

耶律浩善

耶律古雲

耶律圖丹

蕭罕扎

蕭烏頁

蕭道拉字綏蘭約尼溫汗宮人祖尼嚕古北院樞密副使父薩滿字和爾沁重熙初補授祗候郎君累遷北面

林牙十九年從耶律伊遜蕭博諾伐夏至蕭惠敗績之地獲偵候者知人煙聚落多國人陷沒而不能還者盡俘以歸拜大父詳袞知山北道邊境事清寧初歷西南面西北路招討使加同中書門下平章事卒道拉體貌豐偉善騎射由祇候郎君陞漢人行宮副部署後為烏爾古德喀勒統軍使克敵有功加龍虎衛上將軍授西北路招討使因陳北邊利害請以本路諸部與倒塌嶺統軍使連兵屯戍再表不納改東北路統軍使乾統初

以久練邊事復為西北路招討使北準布額圖格爾率鄰部來侵道拉逆擊追奔數十里乘額圖格爾無備以輕騎襲之獲馬萬五千匹牛羊稱是先是有詔方面無事招討副統軍都監內一員入覲是時同僚皆闕道拉以軍事付幕吏而朝坐是免官改西京留守復為東北路統軍卒于官

蕭布達字彈隱統和初為南院承旨開泰六年為烏爾古節度使七年德哱勒叛平之徙烏爾古德哱勒都監

遣德喀勒騎卒取北準布名馬以獻詔褒獎重熙初改
烏爾古德喀勒都詳袞討諸番有功布達深練邊事能
以悅使人有所俘獲悉散麾下由是大得衆心歷西南
面招討使党項叛入西夏布達討之中流矢歿于陣帝
聞惜之賻贈加厚

耶律浩善字托紐北院額爾奇木博果濟後祖徹珍北
院大王父和克黃皮室詳袞浩善初為西南巡邊官以
廉潔稱累遷南京統軍使尋為北院大王重熙十一年

党項部人多叛入西夏浩善受詔巡西邊沿河要地多
建城堡以鎮之徙東京留守十三年與知府蕭烏魯斯
討博囉滿達勒有功加兼侍中致仕卒

耶律古雲字穆喇齊北院林牙圖魯卜之後有膂力工
馳射開泰間為烏爾古德喀勒都監會部人叛從樞密
使耶律世良討平之以功詔鎮撫西北部教以種樹畜
牧不數年民多富實中京盜起命古雲為巡邏使悉擒
之上親征渤海將黃皮室軍有破敵功累遷御史中丞

尋授開遠軍節度使徙鎮歸德二十一年改天成軍節
度使卒于官年七十贈同中書門下平章事二子伊遜
鄂摩伊遜重熙間從蕭惠討西夏惠敗績伊遜一軍獨
全拜北院大王鄂摩太康三年為漢人行宮副部署伊
遜誣害太子詞連鄂摩帝釋之是秋伊遜復奏與蕭楊
結私議宮壺事被害乾統間贈同中書門下平章事

耶律圖丹字和爾沁太師古雲之子重熙初為左護衛
將禁兵從伐夏有功授十二行紂司徒再舉伐夏圖丹

括山西諸郡馬還遷伊喇詳袞西南未平命圖丹同知
金肅軍事夏人來侵擊敗之進納喇阿爾威節度使清
寧元年召為皇太后左護衛太保四年改寧遠軍節度
使東路饑奏振之歷五國烏爾古遼興軍三鎮節度使
四捷軍詳袞太康元年卒追贈同中書門下平章事子
阿蘇有傳

蕭罕扎國舅之族姓端簡謹愿動循禮法清寧中為護
衛太保太康二年遷知北院樞密副使三年經畫西南

邊天池舊塹立堡砦正疆界刻石而還為漢人行宮都
部署是年秋獵墮馬卒

蕭烏頁字草隱其先出興聖宮分觀察使塔哩濟之孫
也性孝悌尚禮法雅為鄉黨所稱重熙中補護衛興宗
見其勤恪遷護衛太保佐耶律仁先平重元亂以功加
團練使時德喀勒數為鄰部侵擾民多困弊命烏頁為
德喀勒節度使恤困窮省徭役不數月部人以安尋以
母老歸養于家母亡尤極哀毀服闋歷官興聖延慶二

宮使卒

論曰烏爾古德喀勒大部也道拉統軍克敵有功布達
居邊悅以使人西北重鎮也浩善巡邊以廉稱古雲鎮
撫而民富圖丹駐金肅而夏人不敢東獵噫部人內附
方面以寧雖朝廷處置得宜而諸將之力抑亦何可少
哉

遼史卷九十二

遼史卷九十二考證

耶律古雲傳二十一年古雲改天成軍節度使 按聖
宗本紀統和二十九年之次年改元開泰閱八年又
改元太平閱十一年興宗即位改元景福止一年即
改元重熙凡二十四年此所書二十一年應係指重
熙二十一年然考興宗本紀二十一年內無耶律古
雲改天成軍節度使之文未敢遽指為重熙間事姑
仍其舊

遼史卷九十二考證

欽定四庫全書

遼史卷九十三

元中書右丞相總裁托克托等修

列傳第二十三

蕭惠

慈實努

蕭雅魯

都勒幹

蕭托雲

耶律都沁

蕭惠字伯仁小字托果斯淳欽皇后弟阿古齊五世孫
初以中宮親為國舅詳袞從伯父巴雅爾征高麗至努

克特北嶺高麗阻險以拒力戰破之及攻開京以軍律
整肅開授契丹行宮都部署開泰二年改南京統軍使
尋為右伊勒布已加同中書門下平章事朝議以遼東
重地非勲戚不能鎮撫乃命惠知東京留守事改西北
路招討使封魏國公太平六年討回鶻阿爾斯蘭徵兵
諸路獨準布酋長濟喇後期立斬以徇進至甘州攻圍
三日不克而還時濟喇之子聚兵來襲準布酋長烏已
密以告惠未之信會西準布叛襲三克軍都監尼嚕古

圖吉部節度使嘉哩額布勒等將兵三千來救遇敵于
哈屯城西南嘉哩額布勒戰歿士卒潰散惠倉卒列陣
敵出不意攻我營衆請乘時奮擊惠以我軍疲敝未可
用弗聽烏已請以夜斫營惠又不許準布歸惠乃設伏
兵擊之前鋒始交敵敗走惠為招討累年屢遭侵掠士
馬疲困七年左遷南京侍衛親軍馬步軍都指揮使尋
遷南京統軍使興宗即位知興中府歷順義軍節度使
東京留守西南面招討使加開府儀同三司檢校太師

兼侍中封鄭王賜推誠協謀竭節功臣重熙六年復為契丹行宮都部署加守太師徙王趙拜南院樞密使更王齊是時帝欲一天下謀取三關集羣臣議惠曰兩國彊弱聖慮所悉宋人西征有年師老民疲陛下親率六軍臨之其勝必矣蕭孝穆曰我先朝與宋和好無罪伐之其曲在我況勝敗未可逆料願陛下熟察帝從惠言廼遣使索宋十城會諸軍于燕惠與太弟帥師壓宋境宋人重失十城增歲幣請和惠以首事功進王韓十二

年兼北府宰相同知元帥府事又爲北樞密使十三年
夏國李元昊誘山南党項諸部帝親征元昊懼請降惠
曰元昊忘喪世恩萌姦計車駕親臨不盡歸所掠天誘
其衷使彼來迎天與不圖後悔何及帝從之詰旦進軍
夏人列拒馬于河西蔽盾以立惠擊敗之元昊走惠麾
先鋒及右翼邀之夏人千餘潰圍出我師逆擊大風忽
起飛沙眯目軍亂夏人乘之蹂踐而死者不可勝計詔
班師十七年尚帝姊秦晉國長公主拜駙馬都尉明年

帝復征夏國惠自河南進戰艦糧船綿亘數百里既入敵境偵候不還鎧甲載于車軍士不得乘馬諸將咸請備不虞惠曰諒祚必自迎車駕何暇及我無故設備徒自弊耳數日我軍未營候者報夏師至惠方詰妄言罪諒祚軍從阪而下惠與麾下不及甲而走追者射惠幾不免軍士死傷尤衆師還以惠子慈實努斃于陣詔釋其罪十九年請老詔賜肩輿入朝策杖上殿辭章再上乃許之封魏國王詔冬夏赴行在參決疑議既歸遣賜

湯藥及他賜賚不絕每生日輒賜詩以示尊寵清寧二年薨年七十四遺命家人薄葬訃聞輒朝三日惠性寬厚自奉儉薄興宗使惠恣取珍物惠曰臣以戚屬據要地祿足養廉奴婢千餘不為闕乏陛下猶有所賜貧於臣者何以待之帝以為然故為將雖數敗衄不之罪也弟實喇武定軍節度使二子慈實努烏爾古納烏爾古納終北府宰相慈實努字寧隱太平初補祇候郎君上愛其勤慎陞扎薩克轄加右監門衛上將軍西邊有警

授西北路招討都監領保大軍節度使政濟恩威諸部
悅附為殿前副點檢歷烏爾古德喀勒詳哀征李諒祚
為統軍都監與西北路招討使達魯噶率番部諸軍由
北路趨涼州獲諒祚親屬夏人扼險以拒慈實努中流
矢卒年五十一贈中書門下平章事

蕭雅魯字和爾沁五院部人父揚珠歷宮節度使雅魯
重熙間為牌印郎君清寧九年國家既平重元之亂其
黨郭九等亡詔雅魯追捕獲之遷護衛太保咸雍元年

使宋議邊事稱旨知殿前副點檢事五年準布叛為行
軍都監擊敗之俘獲甚衆初軍出止給五月糧過期糧
乏士卒往往叛歸雅魯坐失計免官降戍西北部未行
會北部兵起雅魯將烏爾古德喀勒兵敗之每戰以身
先繇是釋前罪命總知烏爾古德喀勒部九年德喀勒
叛都監耶律都木達以兵少不戰屯臚朐河德喀勒合
邊人掠居民雅魯力戰敗之獲其輜重繼聞酋長和卓
三千餘騎掠附近部落縱兵躡其後連戰二日斬數千

級盡得被掠人畜而還值德喀勒黨五百餘騎刼捕鷹
戶逆擊走之俘斬甚衆自是德喀勒勢沮時德喀勒方
為邊患準布相繼寇掠邊人疲弊朝廷以地遠不能時
益援軍而使疆圉帖然者皆雅魯力也帝嘉其功拜左
皮室詳袞會宋求天池之地詔雅魯兼統兩皮室軍屯
達里庫山以備之太康初準布叛遷西北招討都監從
都統耶律卓克算征討有功改南京統軍都監黃皮室
詳袞尋遷東北路統軍都監卒弟都勒幹

都勒幹字薩巴幼警悟異常兒三歲失母哭盡哀見者傷之及長魁偉沉毅好學善屬文有才幹年三十始仕為朝野推重給事北院知聖旨事太康二年伊遜再入樞府都勒幹素與蕭巖壽善誣以罪謫戍西北部坐皇太子事特恩減死仍錮終身在戍十餘年太子事稍直始得歸鄉里屏居謝人事一日臨流聞雉鳴三復孔子時哉語作古詩三章見志當時名士稱其高情雅韻不減古人壽隆六年卒年六十一乾統初贈彰義軍節度

使

蕭托雲字烏延北府宰相哈里之子統和初皇太后稱制以戚屬入侍尋為烏爾古都監討舒穆魯等部有功遷烏爾古節度使十九年總領西北路軍事後以本路兵伐甘州降其酋長伊蘭既而伊蘭復叛命討之克肅州盡遷其民于托輝口故城師還詔尚金鄉公主拜駙馬都尉加同政事令門下平章事上言曰準布今已服化宜各分部治以節度使上從之自後節度使往往非

材部民怨而思叛開泰元年七月錫林太師阿勒達殺其節度使西奔鄂爾多城蓋古所謂龍庭單于城也已而準布復叛圖托雲于哈屯城勢甚張托雲使諸軍聲射却之屯于鄂爾多城明年北院樞密使耶律華格引兵來救托雲遣人誘諸部皆降帝以托雲始雖失計後得人心釋之仍領諸部請益軍詔讓之曰叛者既服兵安用益且前日之役死傷甚衆若從汝謀邊事何時而息遂止會公主坐殺家婢降封郡主托雲罷使相尋為

烏爾古德喀詳袞以老代還卒子雙寬南京統軍使
孫額圖琿尚三韓郡王赫魯之女固頁公主終烏爾古
德喀勒部統軍使以善戰名于世

耶律都沁字達年積慶宮人仕統和間性疎簡不顧小
節人初以是短之後侵宋分總羸師以從及戰取緋帛
被介冑以自標顯馳突出入敵陣格殺甚衆太后望見
喜召謂之曰卿戮力如此何患不濟厚賞之由是多以
軍事屬任俄授東北詳袞開泰二年進討準布克之重

熙間歷東路統軍使天德軍節度使十七年城西邊命
都沁相地及造戰艦因成樓船百三十艘上置兵下立
馬規制堅壯稱旨及西征詔都沁率兵由別道進會于
河濱敵兵阻河而陣帝御戰艦絕河擊之大捷而歸親
賜卮酒仍問所欲都沁對曰臣幸被聖恩得効駑力萬
死不能報國又將何求帝愈重之手書都沁衣裾曰勤
國忠君舉世無雙卒于官年七十子迪里歷觀察節度
使

論曰初遼之謀復三關也蕭惠贊伐宋之舉而宋人增幣請和狃於一勝移師西夏而勇智俱廢敗潰隨之豈非貪小利迷遠圖而然況所得不償所亡利果安在哉同時諸將撫綏邊圉若頁嚙忠勤不伐都勒幹高情雅韻都沁雖廉不逮蕭惠而無邀功啟釁之罪亦庶乎君子之風矣

遼史卷九十三

遼史卷九十三考證

蕭惠傳十七年尚帝姊秦晉國長公主拜駙馬都尉

按帝字原本誤作弟今據弘簡錄改

蕭托雲傳十九年總領西北路軍事後以本路兵伐甘
州降其酋長伊蘭 按聖宗本紀統和二十六年蕭
托雲奏討甘州回鶻降其王耶刺里撫慰而還此處
原本稱降其酋長牙懶即此事也牙懶與耶刺里俱
係音近之譌今畫一改

總論內都勒幹高情雅韻都沁雖廉不逮蕭惠而無邀
功啟釁之罪亦庶乎君子之風矣 按都勒幹高情
雅韻等句原本作鐸軫高情雅韻鐸盧幹雖廉不逮
惠而無邀功啟釁之罪考高情雅韻係都勒幹傳中
語都沁傳無此四字蓋都勒幹原本作鐸盧幹都沁
原本作鐸軫兩名俱有鐸字遂至互易其名而誤也
今據傳改正

遼史卷九十三考證

欽定四庫全書

遼史卷九十四

元中書右丞相總裁托克托等修

列傳第二十四

耶律華格

耶律幹拉

耶律蘇色

蕭阿嚕岱

耶律納延

耶律和囉木薩噶

耶律世良

耶律華格字弘隱孟父楚國王之後善騎射乾亨初為

北院林牙統和四年南侵宋華格擒謀者知敵由海路來襲即先據平州要地事平拜上京留守遷北院大王十六年復侵宋為先鋒破敵于遂城以功遷南院大王尋改北院樞密使開泰元年伐準布準布棄輜重遁走俘獲甚多帝嘉之封幽王後邊吏奏自華格還闕糧乏馬弱勢不可守上復遣華格經略西境華格與邊將深入聞番部逆命居伊濟水華格徐以兵進敵望風奔潰獲羊馬及輜重路由白拔烈遇阿爾斯蘭回鶻掠之都監紐幹哩謂華

格曰君誤矣此部實効順者華格悉還所俘諸番由此
不附上使案之削王爵以侍中遙領大同軍節度使卒
耶律幹拉字斯寧奚德呼勒人趨捷有力善騎射保寧
初補護衛車駕獵頡山適豪猪伏叢莽帝射中猪突出
御者圖們捨轡而避廐人鶴骨翼之幹拉復射而斃帝
嘉賞及獵赤山適奔鹿奮角突前路隘不容避垂犯蹕
幹拉以身當之鹿觸而顛帝謂曰朕因獵兩瀕于危賴
卿以免始見爾心遷護衛太保從樞密使耶律色珍破

宋將楊繼業軍于山西統和十三年秋為行軍都監從都部署奚王和碩斡伐烏舍烏哲圖數月至其城烏哲圖請降和碩斡利其俘掠令四面急攻烏哲圖死守隨方捍禦依埤堦虛構戰棚誘我軍登陴俄撤枝柱登者盡覆和碩斡知不能下欲退蕭恒德謂師久無功何以藉口若深入大掠猶勝空返幹拉曰深入恐所得不償所損恒德不從畧地東南循高麗北鄙還道遠糧絕人馬多死詔奪諸將官惟幹拉以前議得免尋加同政事

門下平章事為東京留守開泰中卒

耶律蘇色字阿敏性忠直簡毅練武事應歷初為侍從累遷圖魯卜部節度使歷霸濟祥順聖五州都總管俄為敦睦宮太師保寧三年改九部都詳袞四年伐党項屢立戰功手詔勞之統和初皇太后稱制西邊甫定蘇色務安集諸蕃利害輒具以聞太后益信任之凡臨戎與士卒同甘苦所獲均賜將校賞順討逆威信大振在邊二十年卒

蕭阿魯岱字伊實音威部人父農古仕至糾詳衮阿魯
岱習騎射曉兵法清寧間始仕累遷本部司徒改烏爾
古德喀勒統軍都監大安七年遷山北副部署九年達
勒達博索摩二部來侵率兵擊却之達勒達復劫牛羊
去阿魯岱引兵追及盡獲所掠斬渠帥數人是冬達勒
達等以三百餘人梗邊復戰却之斬首二百餘級加金
吾衛上將軍封蘭陵縣公壽隆元年第功加同中書門
下平章事進爵郡公改西北面招討使乾統三年坐留

宋俘當遣還者為奴免官後被徵以老疾致仕卒

耶律納延字伊實年額爾奇木博果濟後父幹常為北
剋從伐夏戰歿季父卓克算為宿直官累遷至北面林
牙咸雍四年拜北院大王改西南面招討使太康中西
北諸部擾邊議欲往討帝以為非卓克算不可拜西北
路招討使兼行軍都統平之以功復為北院大王納延
敦厚才敏上以其父幹死王事九歲加諸衛小將軍為
圖哩司徒尋召為宿直官太康三年為約尼剋大安九

年為倒塌嶺節度使明年冬以北準布長磨古斯叛與
招討都監耶律呼哩率精騎往討破之納延薦呼哩為
漢人行宮副部署壽隆初復討達勒達博索摩等有功
賜詔褒美改烏爾古德呼勒統軍使邊境以寧部民乞
留詔許再任乾統六年拜中京留守改北院大王薨納
延為人廉介長于理民每有鬪訟親覈曲直不尚威嚴
常曰凡治人本欲分別是非何事迫脅以立名故所至
以惠化稱

耶律和囉木薩噶字烏庫哩孟父房之後重熙末補祇
候郎君清寧初加安州團練使太康中歷懷德軍節度
使奚六部圖哩太尉詔與樞密官措畫東北邊事改左
護衛太保侍上言多率易察其無他故上優貸之八年
知西北路招討使事時邊部尼都格爾等來侵和囉木
薩噶誘北準布酋豪磨古斯攻之俘獲甚衆加左僕射
復討尼都格爾等誤擊磨古斯北準布由是叛命遣都
監張九討之不克二室韋與六院部特們羣牧宮分等

軍陷于敵和囉木薩噶不以實聞遂削官決大杖壽隆間累遷特哩衮兼侍中賜保節功臣道宗崩與宰相耶律儼總山陵事乾統中致仕卒

耶律世良小字幹六院部人才敏給練達國朝典故及世譜上書與族弟迪里爭嫡庶帝始識之時北院樞密使韓德讓病帝問孰可代卿德讓曰世良可北院大王耶律舒魯復問北院之選德讓曰無出世良統和末為北院大王開泰初因大冊禮加檢校太尉同政事門下

平章事時邊部拒命詔北院樞密使耶律華格將兵以
世良為都監往禦之明年華格還將罷兵世良上書曰
華格以為無事而還不思師老糧乏敵人已去馬能久
守若益兵可克也帝即命華格益兵與世良追之至安
真河大破而還自是邊境以寧以功王岐拜北院樞密
使三年命選馬馳于烏爾古會德喀勒部人伊喇殺其
酋長刷而叛鄰部皆應攻陷巨穆古城世良率兵壓境
遣人招之降數部各復故地四年伐高麗為副部署都

統劉慎行逗遛失期執還京師世良獨進兵明年至北
都護府破追兵于郭州以暴病卒

論曰大之懷小也以德制之也以威德不足懷威不足
制而欲服人也難矣華格利俘獲而諸番不附和囉木
薩噶誤擊磨古斯而準布叛命皆喜於一旦之功而不
圖後日之患庸何議焉若幹拉之戒深入蘇色之務安
集亦鐵中之錚錚者邪

遼史卷九十四

遼史卷九十四考證

耶律和囉木薩噶傳 按和囉木薩噶於壽隆間為東
京留守乾統三年為南院大王詳弘簡錄傳未載

遼史卷九十四考證

欽定四庫全書

遼史卷九十五

元中書右丞相總裁托克托等修

列傳第二十五

耶律鴻觀

耶律瑪魯

蕭迪里

耶律達魯

耶律辰嘉努

耶律特默

耶律仙童

蕭素颯

耶律大悲努

耶律鴻觀字和爾沁樞密使華格之弟統和間累遷順

義軍節度使入為北面林牙太平元年加同政事門下
平章事為彰國軍節度使兼山北道兵馬都部署徙武
定軍節度使拜特哩袞六年討準布有功聖宗嘗刺臂
血與鴻觀盟為友禮遇尤異拜南府宰相改上京留守
重熙六年遷南院大王御製誥辭以寵之十三年加裕
悅帝憫其勞復授武定軍節度使卒訃聞上哭曰惜哉
善人喪至親臨奠焉

耶律瑪魯字揚隱孟父楚國王之後性寬和善諧謔親

朋會遇一坐盡傾恬于榮利與耶律鴻觀為刺血友鴻
觀為特哩袞補宿直官重熙初遷旗鼓伊喇詳袞為人
畏慎容物或有面相陵折者恬然若弗聞不臧否世務
以故上益親狎三年遷崇德宮使為特哩袞御製詰辭
褒之拜北院宣徽使寵遇過宰輔帝常以兄呼之改遼
興軍節度使卒年七十子努克特終南京宣徽使

蕭迪里字國寧約尼森濟汗宮人重熙初遙攝鎮國軍
節度使六年奉詔使宋傷足而跛不告遂行帝怒及還

決以大杖降同簽南京留守事遙授靜江軍節度使歷
羣牧都林牙累遷右伊勒布己以才幹見任使會車駕
西征元昊乞降帝以前後反覆遣迪里往覘誠否因為
元昊陳述禍福聽命乃還拜北院樞密副使出為中京
留守十九年改西京留守卒

耶律達魯字薩蘭清寧初為本班郎中稍遷宿直官乾
統中從伐準布有功加奉宸歷護衛太保改弘義宮副
使時上京梟賊趙鍾格跋扈自肆達魯擒之加泰州觀

察使為達魯噶部節度使天慶中知興中府加金吾衛
上將軍為盜所殺

耶律辰嘉努字綿辛懿祖弟噶拉之八世孫重熙中補
牌印郎君坐直日不至降本班會帝獵辰嘉努逐鹿圍
內鞭之二百時耶律仁先薦辰嘉努健捷比海東青鵬
授御盞郎君歷鷹坊尚廐四方館副使改圖噶庫皮室
詳袞會太后生辰進詩獻馴鹿太后嘉獎賜珠二排雜
綵二百段兄薩巴卒辰嘉努聞訃不告而去帝怒鞭之

清寧初累遷右伊勒布巴適帝與燕國王射鹿俱中王時九歲帝悅辰嘉努應制進詩帝喜解衣以賜後皇太子廢帝疑辰嘉努黨附罷之時西北諸部寇邊以辰嘉努為烏爾古節度使行軍都監賜甲一屬馬二匹討諸部擒其酋送于朝偵候者見馬蹤意寇至辰嘉努遣報元帥耶律愛努視之曰此野馬也將出獵賊至愛努戰歿有司詰案辰嘉努不伏詔釋之由是感激每事竭力後諸部復來侵辰嘉努率兵三往皆克邊境遂寧以老

告歸不從道宗崩為山陵使致仕年八十卒

耶律特默季父房之後重熙間為北剋累遷六部圖哩
太尉大安四年為倒塌嶺節度使頃之為禁軍都監是
冬討磨古斯斬首二千餘級十年復討之既捷授南院
宣徽使壽隆元年為北院大王四年知黃龍府事薨

耶律仙童仲父房之後重熙初為宿直官累遷特哩袞
都監以寬厚稱富珠哩叛仙童為五國節度使率師討
之擒其帥托多羅又擊威叛降其衆改彰國軍節度使

拜北院大王清寧二年知黃龍府事遷侍衛親軍馬步軍都指揮歷忠順武定二軍節度使致仕封蔣國公咸雍初徙封許國卒

蕭素颯字特默五院部人重熙間始仕累遷北院承旨彰愍宮使清寧初歷左皮室詳袞右伊勒希巴咸雍五年博和哩叛素颯降之率其酋長來朝帝嘉其功徙北院林牙改南院副部署卒子穆喇斡字和琳補伊勒希巴郎君遷文班太保太康中改南京統軍使為右伊勒

希已與樞密使耶律阿蘇論事不合見忌出為馬羣太保北部來侵穆喇斡破之遷同知烏爾古德喀勒統軍仍許便宜行事後以讒毀降領西北路戍軍復為馬羣太保卒

耶律大悲努字糾堅王子班尼魯古之後太康中歷永興建昌宮使右皮室詳袞會準布叛奉詔招降之壽隆初拜殿前都點檢乾統初歷上京留守特哩袞復為都點檢改西南面招討使請老不許天慶中留守上京領

北南樞密院點檢中丞諸司等事以彰國軍節度使致仕卒大悲努舉止馴雅好禮儀為時人所稱

論曰遼自神冊而降席富彊之勢內修法度外事征伐一時將帥震揚威靈風行電埽討西夏征党項破準布平德將勒諸部震懾聞輦鼓而膽落股弁可謂雄武之國矣其戰勝攻取必有奇謀秘計神變莫測者將前史所載不足以發之邪抑天之所授衆莫與爭而能然耶雖然兵者凶器可戢而不可玩爭者末節可遏而不可

名此黃石公所謂柔能制剛弱能制彊也又況乎仁者之無敵哉遼之君臣智足守此金人果能乘其敝而躡其後乎是以於耶律鴻觀輩諸將不能無慨然也

遼史卷九十五

遼史卷九十五考證

耶律鴻觀傳十三年加裕悅 按興宗本紀重熙十二年八月庚申裕悅耶律鴻觀薨是鴻觀之加裕悅尚在重熙十二年之前也傳作十三年加裕悅與紀互異

遼史卷九十五考證